

**SISWATI LULWIMI LWEKUCALA LWEKWENGETA: LIPHEPHA I**  
**SISWATI FIRST ADDITIONAL LANGUAGE: PAPER I**

Sikhatsi: 2½ Emahora

Emamaki: 100

---

**TICONDZISO**

1. Leliphepha linetigaba letine nemakhasi la-11.
  2. Landzela ticondziso taleso naleso sigaba.  
  
SIGABA A: SIVISISO  
SIGABA B: SIFINYETO  
SIGABA C: TINKONDLO  
SIGABA D: TAKHI NETIMISO TEKUSETJENTISWA KWELULWIMI
  3. Phendvula yonkhe imibuto ngeSiswati lesemukelekile.
  4. Cala leso naleso sigaba ekhasini lelisha uphindze udvwebele ekugcineni kwaleso naleso sigaba.
  5. Shiya umugca emkhatsini wetimphendvulo takho.
  6. Caphela sipelingi (lupelomagama) nendlela lekwakhiwa ngayo imisho.
-

## SIGABA A SIVISISO

### UMBUTO 1

1.1 Fundza lethekesthi bese uphendvula imibuto lelandzelako.

#### ITHEKSTHI A

##### **BANTFU LABABUYA EMAVENI ANGAPHANDLE**

Kungavunyelwa kwetigulane letibuya kulamanye emave letingenawo emaphepha latinika imvumo kutsi tibe kulelive kuholela ekutseni kusabalale tifo. Loku kushiwo ngudokotela Tasanya we-*Doctors Without Borders* ngalesikhatsi bacobelelana ngelwati lapho bekudzingidvwa khona ludzaba lwekutsi ngabe labasikati nebantfwana labaneminyaka lengephasi kulesitfupha, labahlala lapha eveni bayasitakala yini etikhungweni tetemphilo talelive mahhala njengoba kusho umtsetfosisekelo.

Nkhosikati Sibusisiwe Ndlela we-*Section 27* utsite imibiko labayitfolile itsi labasikati kanye nebantfwana lababuya kulamanye emave labangenawo emaphepha kuyenteka ngalesinye sikhatsi bangalutfoli lusito etikhungweni tahulumende, noma ngalesinye sikhatsi babhadaliswe imali ngobe bangenawo emaphepha. Umtsetfosisekelo walelive utsi bonkhe bantfu labahlala lapha eveni banemalungelo ekutfoli lusito lwetemphilo mahhala, uma bakhulelwe kanye nebantfwana babo labaneminyaka lesitfupha kuya phasi. Akunandzaba kutsi banemaphepha nobe cha. Loku kwenteka kuletinye tikhungo tahulumende ikakhulukati etibhedlela. Labomake bayaya emitfolamphilo badluliselwe etibhedlela bafike bahlangabetane netinkinga tekutsi kufanele babhadale.

Kungavunyelwa kwabo kungabukeka shengatsi kukonga tinsita letibekelwe bantfu bakulelive kantsi loko kubhebhethsekisa tifo. Nangabe sigulane singavunyelwa kutsi sitfole lusito kantsi sinesifo lesitsatselanako lesifana nesandvulelangculazi nobe sifo sesifuba, ngaleyondlela lesifo singasabalala eveni lonkhe. Letinye tigulane tisitakala uma tingene nge-ambulensi etibhedlela. Letigulane tiyasitakala kodvwa ngalesinye sikhatsi atinikwa bufakazi bekutsi titele, bese atisakhoni kwentela bantfwana bato titifiketi tekutalwa. Nangabe loyo mntfwana lotelwe sekafuna kuya esikhungweni setemphilo nobe esikolweni uba nenkinga ngobe kusuke kute bufakazi bekutsi watalelwa kuphi.

Nkhosikati Liesl Muller we-*Centre for Child Law*, utsite uMtsetfosisekelo walelive uyabavumela bonkhe bomake nebantfwana kutsi batfole lusito lwetemphilo labaludzingako mahhala etikhungweni tetemphilo tahulumende. Nangabe bantfu labanyenti bangavumeli bantfu lababuya kulamanye emave kutsi batfole lusito ngobe batsi abanamaphepha nabo kufanele bati kutsi kukhona nebantfu labaningi balelive nabo labangenawo emaphepha lachaza kutsi basukaphi ngobe batali babo nabo bangenabo bomatishi. Kulelive bobabe basandza kuvunyelwa kutsi nabo sebangakwati kutsatsela bantfwana babo titifiketi tekutalwa uma baya emahhovisi eMnyango weTaseKhaya. Bantfwana labatelwe bangakakalindzelwa ngalesinye sikhatsi babese bayahlalwa, loko kubente babe nenkinga ngekuhamba kwesikhatsi, kuba matima kubo kutfoli titifiketi tekutalwa. Kubese kutsiwa lomntfwana kwabangelwa yini kutsi angatfoli tincwadzi kusenesikhatsi? Ngaleso sizatfu umntfwana ubese uyabambeleleka etintfweni letinyenti, lokufaka ekhatsi kungena esikolweni kusenesikhatsi kantsi umtsetfo wakulelive utsi wonkhe umntfwana kufanele aye esikolweni.

[Phili Mjozi: 16 Lweti 2022]

- 1.1.1 Bhala tifo letimbili letiyingoti letitsatselanako letibhalwe kuletheksthi lengenhla. (2)
- 1.1.2 Bantfwana labaneminyaka lemingaki lababuya kulamanye emave labavunyelwa kutsi balashwe mahhala kulelive? (1)
- 1.1.3 Tibhedlela tiwela ngaphasi kwaliphi litiko lahulumende? Khetsa imphepvulo kuleti letilandzelako:
- A Litiko leTemfundvo.  
B Litiko leTemphilo.  
C Litiko leTebulungiswa  
D Litiko leTasekhaya. (1)
- 1.1.4 Ngekubona kwakho yini imbangele yekutsi bantfu balamanye emave babalekele kulelive letfu? (2)
- 1.1.5 Utsini umtsetfosisekelo walelive ngekulashwa kwebantfu lababuya kulamanye emave ikakhulukati labasikati nalabo labatetfwele? Chaza. (2)
- 1.1.6 Ngabe bantfu lababuya kulamanye emave balutfolela ngalokufanelekile yini lusito etibhedlela? Chaza. (2)
- 1.1.7 Wena ubona kuyintfo lenhle yini kutsi bobabe bavunyelwe kutsatsela bantfwana babo titifiketi tekutalwa? (2)
- 1.1.8 Ngekucabanga kwakho kubangelwa yini kutsi bomake batale bantfwana bese bayabalahla? (2)
- 1.1.9 Bhala tinkinga letimbili letibaliwe kuletheksthi letibukana nebantfwana labangenato titifiketi tekutalwa. (2)
- 1.1.10 Ngekubona kwakho yini lengentiwa kute kungaswelakali imitsi etibhedlela nasemitfolamphilo yakulelive? (2)
- 1.1.11 Yini intfo lekufanele yenteke kute kulawulwe kungena kwebantfu lababuya kulamanye emave ngaphandle kwemvumo? (2)

1.2 Fundza lesibonwa bese uphendvula imibuto lelandzelako:

**ITHEKSTHI B SIBONWA**



- 1.2.1 Bhala tizatfu letimbili letenta umuntfu atifuyeleinja ekhaya lakhe. (2)
- 1.2.2 Bantfu labanjani lekufanele banikwe invumo yekuba naloluhlobo lwenja lolulapha kulesibonwa? (2)
- 1.2.3 Nguyiphi indzima lengadlalwa nguhulumende ekuvimbeni kutsi bantfu bangabulawa nguloluhlobo lwetinja? Chaza. (2)
- 1.2.4 Kubaluleke ngani kwekutsiinja yakho uyitsatse iyobona dokotela ngaso sonkhe sikhatsi? (1)
- 1.2.5 Ngusiphi sikhungo lesibuka kunakekelwa nekuhlukunyetwa kwetilwane lapha eveni? (1)
- 1.2.6 Wena ucabanga kutsi kuyintfo lenhle yini kutsi letinja tifuywe eticiwini tetinyamatane? (2)
- [30]

**30 emamaki**

## **SIGABA B SIFINYETO**

### **UMBUTO 2**

Fundza lethekesthi lelandzelako bese uyayifinyeta **ngemagama akho langengci kula-60** ubhekise **kutintfo lekufanele utente kute uvikele sikhumba sakho ekushisweni lilanga.**

### **TICONDZISO TEKUFINYETA**

#### **CAPHELA**

1. Sifinyeto sakho asibe ngendlela **yemaphuzu lasihlanu.**
2. Veta emaphuzu lasihlanu laveta loko **lekufanele ukwente kute uvikele sikhumba sakho ekushisweni lilanga.**
3. Caphela kutsi lulwimi lwakho lungabi nemaphutsa kute ungalahlekelwa ngemamaki elulwimi.
4. Sebentisa timphawu tekubhala nekufundza.
5. Bhala linani lemagama lowasebentisile ekugcineni kwesifinyeto sakho.

### **ITHEKSTHI C**

#### **KUVIKELA SIKHUMBA**

Likhipha umkhovu etjeni njengobe seyitfwasile intfwasahlobo. Kungako kubalulekile kunakekela sikhumba sakho ngendlela lefanele. Nangabe ungakwenti loko kungaba nengoti lengakwehlela ebusweni nasesikhumbeni sakho. Labati kabanti ngesikhumba batsi bantfu kufanele banakekele sikhumba sabo ngobe sekusehlobo kantsi futsi kuyashisa kakhulu lapha eveni letfu. Kushisa kakhulu kungaba nemtselela lomubi esikhumbeni ikakhulukati ebusweni.

Londiwe Nyawo lohlala eJozi utsi bantfu kufanele banatse emanti lamanyenti onkhe malanga kute bavikele sikhumba sabo ekushisweni lilanga. I-*sunscreen* lefanele kusetjentiswe yi-*SPF 15* kanye ne-*SPF 30* kute utivikele elangeni uma usebenta kakhulu elangeni. Kufanele futsi kutsi ucapehele kutsi usebentisa lehambisana nesikhumba sakho kantsi futsi kufanele ufundze ticondziso letibhalwe ngaphandle. Smangele Zuma loneminyaka lengemashumi lamatsatfu nakunye, lohlala endzaweni tsite eThekwini utsi bantfu kufanele bacaphele bangasebentisi noma yini labayitfoli etitolo ngobe loko kungadala umonakalo lomkhulu esikhumbeni. Kufanele basebentise imitsi lesemsetfweni nalegunyatiwe kutsi ingasetjentiswa.

Uphindze watsi bantfu kumele bafundziseke ngalokufanele kutsi bente loko lokufanele bakwente kute sikhumba sabo sihlale sisesimeni lekungiso nalesihle. Ukhutsate bantfu kutsi batetayete kubonana nabodokotela besikhumba kantsi futsi labanelwati ngesikhumba kute basigcine siphilile. Lokunye lokumelula bantfu labangakwenta kufaka ema-*mask* babuye bagcobise nelicandza ebusweni kute bavikele sikhumba sabo elangeni.

Noluthando Chisane utsite bantfu kufanele bagweme kugcobisa buso nemtimba ngemikhicito lenemafutsa kute bangatawujuluka kakhulu. Bantfu labanyenti uma babhukusha kufanele bangagcoki timphahla letimanti sikhatsi lesidze ngobe nako loko kungaba yinkinga esikhumbeni.

[Simangaliso Ntshangase: 12 Lweti 2022]

**SIGABA C TINKONDLO**

**UMBUTO 3 INKONDLO LENGAKAFUNDVWA EKLASINI**

**CAPHELA:** Kuphocelekile kutsi wonkhe lohlolwako awuphendvule lombuto.

Fundza lenkondlo bese uphendvula imibuto lelandzelako.

**Sikhali lesinemandla**

- 1 Loko lokucabangako ungiko,
- 2 Loko lokukhulumako ungiko,
- 3 Loko lokwentako ungiko,
- 4 Ingcondvo isikhali lesinemandla.
  
- 5 Uma ungafuni kusolwa
- 6 Bindza kute ungatozondwa.
- 7 Ufe ubindzile ungawatjwe,
- 8 Ulale ngekuthula elibeni lakho.
  
- 9 Kute uphumelele sebenta ngemandla,
- 10 Usebentisane nalabanye bantfu,
- 11 Khumbula kutsi "United we stand, divided we fall".
- 12 Ingcondvo isikhali lesinemandla.
  
- 13 Heyi! Wena lapho!
- 14 Cabanga lokuhle njalo emphilweni,
- 15 Kute utawujabula emphilweni
- 16 Tifo tidlalele kudze nawe,
- 17 Ingcondvo isikhali lesinemandla.

[Siboniso Ngomane]

- 3.1 Bhala bunkondlo lobutsatfu lobutfolakala emgceni we-1 newe-2. (3)
- 3.2 Sonkondlo ulusebentiselani loluphawu "!" emgceni 13 walenkondlo? (1)
- 3.3 Caphuna umugca lowakha imphindvwa kulenkondlo uwubhale phasi. (2)
- 3.4 Phawula ngemoya bekakuwo sonkondlo ngalesikhatsi abhala lenkondlo. (2)
- 3.5 Ngekubona kwakho hlobo luni lwenkondlo lolu? Chaza. (2)

**[10]**

## UMBUTO 4 TINKONDLO LETIFUNDVWE EKLASINI

**Lombuto unemibuto lemibili, (4.1 na 4.2) khetsa munye uphendvule ngawo.**

### LETFWESE-

4.1 Fundza lenkondlo bese uphendvula imibuto lelandzelako.

#### NGENTE NJANI MANJE? – L. X. Nkambule

- 1 Ngentenjani manje
- 2 Nekukhunjulwa kwakho sekukhohlakele?
- 3 Akusanandzaba!
- 4 Ngiyawusala ngiwacocanisa
- 5 Lowawasho usawadl' emabele.
  
- 6 Ngentenjani manje
- 7 Indlelo seyishaye gobolophonjwana?
- 8 Nalowo mtfombo ngangisengakawuboni
- 9 Akusenandzaba!
- 10 Ngabe ngiyabhema manje
- 11 Ngiyatsimula ngiciphita tinyembetana.
  
- 12 Ngentenjani manje
- 13 Lenzawo ingephul' inhltiyo,
- 14 Ngibabuka ngimbony' emehlo,
- 15 Ngibe lusizi ngidzabuke,
- 16 Ngingabe ngisakubonaphi?
- 17 Wawungadzangali kubeketela.
  
- 18 Bakubekile elugagadvwini,
- 19 Akuhhushi moya, akukhali nyoni,
- 20 Ngibona nje ngesangcotfo
- 21 Naso sitigadvula phasi
- 22 Akusanatje lelinemlandvo:
- 23 Sigatjana, ngaso, ngitidvudvute.
  
- 24 Sesiyawubuye sibonane
- 25 Ngaphasi ematfunjini emhlaba.
- 26 Lala uphumule kamnandzi,
- 27 Siyakukhumbula imihla ngemihla.
- 28 **Lala** uphumule kamnandzi
- 29 **Lala** uphumule Msime.

4.1.1 Hlobo luni lwenkondlo lolu? (1)

4.1.2 Bunkondlo buni lobakhiwa ngulamagama lacindzetelwe ekucaleni kwemigca ye-28 newe-29? (1)

- 4.1.3 Ngabe sonkondlo bekakusiphi simo uma abhala lenkondlo? (2)
- 4.1.4 Bunkondlo buni lobakhiwa ngumugca we-24 newe-25? (1)
- 4.1.5 Sonkondlo uphumelele kusebentisa imphindvwa kulenkondlo. Bhala umugca loyimphindvwa kulenkondlo. (1)
- 4.1.6 Usho kutsini sonkondlo ngemugca we-22 newe-23? Chaza. (2)
- 4.1.7 Bhala ngalokuphelele luhlobo lwebunkondlo lobakhiwa nguletinhlavu leticindzetelwe kulomugca lolandzelako:  
  
Lala uphumule kamnandzi, (2)
- 4.1.8 Sonkondlo ulisebentiseleni loluphawu (!) emgceni we-3? Chaza. (2)
- 4.1.9 Bunkondlo buni lobakhiwa ngumugca we-19? (1)
- 4.1.10 Caphuna umugca lonesihabiso, uwubhale phasi. (1)
- 4.1.11 Usho kutsini sonkondlo nakatsi lendzawo imephula inhlitiyo? Chaza ngalokuvakalako. (2)
- 4.1.12 Uphumelele kangakanani sonkondlo kubhala inkondlo lenephethini lehlelekile ngekwemagama aleyo naleyo ndzima? Chaza. (2)
- 4.1.13 Wena ucabanga kutsi nguliphi lelitje sonkondlo lakhuluma ngalo emgceni we-22? (2)
- [20]**

**NOBE**



4.2 Fundza lenkondlo bese uphendvula imibuto lelandzelako.

**Likhadi Lelibovu – C. D. Masilela**

- 1 Imphilo **inguphansi-phezulu**,
- 2 Wena lowabona kunatsa kwenkhukhu.
- 3 Noma ingakhuluphala igcwale indlu,
- 4 Ungatikhipheli likhadi lelibovu!
- 5 Akucali futsi akugcini ngawe - phakama uye phambili!
- 6 Lenkingana loyenweba ibe ngubhazabhaza **iyinselele**.
- 7 Kulomunye ingangentfutwane, kulomunye **iyinselele**.
- 8 Tibale tibusiso takho ucaphele:
- 9 Ingcondvo isikhali lesinemandla - khetsa imphilo!
- 10 Vula emehlo, maningi ematfuba lapha ngephandle,
- 11 Tsani ntinini ngelitubane utsatse litfuba lakho.
- 12 Sigwaca lesihle ngulesishoshako.
- 13 Ungacali nje utinikete likhadi lelibovu

- 4.2.1 Hlobo luni lwenkondlo lolu? Sekela imphendvulo yakho. (2)
- 4.2.2 Bunkondlo buni lobakhiwa ngulamagama lacindzetelwe emgceni we-6 newe-7? (1)
- 4.2.3 Ngabe sonkondlo bekakusiphi simo uma abhala lenkondlo? Chaza. (2)
- 4.2.4 Bunkondlo buni lobakhiwa ngumugca we-10? (1)
- 4.2.5 Caphuna umugca locuketse sihabiso kulenkondlo. (1)
- 4.2.6 Kuliciniso nobe kungumbono yini kutsi ingcondvo isikhali lesinemandla? Sekela imphendvulo yakho. (2)
- 4.2.7 Ngabe sihloko salenkondlo siyahambelana yini naloko lokushiwo ngulenkondlo? Chaza. (2)
- 4.2.8 Sonkondlo ulisebentiselani loluphawu (!) emgceni we-4? Chaza ngalokuvakalako. (2)
- 4.2.9 Ngusiphi sifundvo lesitfolwa tetsamelilwati uma tifundza lenkondlo? (2)
- 4.2.10 Bunkondlo buni lobakhiwa ngulamagama lacindzetelwe emgceni wekucala? (1)
- 4.2.11 Bunkondlo buphi lobakhiwa nguletinhlavu letigcamile emgceni we-8? (1)
- 4.2.12 Shano tintfo letimbili lekufanele utente uma uhlangabetana netinkinga lotibona tingetulu kwemandla akho. (2)
- 4.2.13 Lesentakutsi 'ntinini' sichazani njengoba sisetjentiswe kulenkondlo? (1)

**[20]**

**30 emamaki**

## SIGABA D TAKHI NETIMISO TEKUSETJENTISWA KWELULWIMI

### UMBUTO 5

5.1 Fundza lethekesthi bese uphendvula imibuto lelandzelako.

#### ITHEKSTHI D

##### TINTFOMBI TAMASKANDI

Kujabule tibukeli ngalesikhatsi kungena esiteji Buselaphi Gxowa naDumisile Mthlane. Bobabili bebhlanganyele nalabanye baculi kuleviki leliphelile enkhundleni yetemidlalo. Bobabili besebayingwe nengwenyama kodvwa kuhlokome inkhundla ngalesikhatsi bababona bakanyekanye. Badvuma kakhulu basacula ndzawonye kuMthente ngo-1993. Lelicembu liwuhambile umhlaba futsi latfolane nemiklomelo. Imithente yabuye yatitfolela imiklomelo ku-*South African Music Awards (SAMA)*. Imithente yatiwa kakhulu ngetingoma letifaka ekhatsi leti letilandzelako: *Ubezothini, Simqonda Ngqo, Isidikiselo, Intuthwane* naletsi *Ungiyane*.

Emuva kwekufa kwemsunguli walelicembu yahlakateka Imithente. Phela Imithente bekungilo kuphela licembu leliwashaya onkhe. Buselaphi wabese ucala kuticulela yedvwa. Kwabuye kwaba nemsindvo Buselaphi naDumisile sebakanga ikhumbi yalelicembu kantsi futsi lokwabhebhethsekisa lomlilo ngikutsi abekho ecenjini linye letembangave. Noma kunjalo labaculi babuye batehlisa bakhohlwa ngalokwenteka.

Balandzeli balelicembu bafisa kungatsi labaculi bangachubeka nekucula ndzawonye kodvwa bona batsi abacabangi kutsi intfo lenjalo ingenteka. Loku bebakwentela kukhombisa umphakatsi kutsi noma ningaboni ngeliso linye kuyadzingeka kutsi nicolelane. Nasemcimbini bacula ndzawonye lapho bebacelwe nguSjava kutsi bacule letingoma letingabuni teMithente.

[Charles Khuzwayo: 12 Lweti 2022]

- 5.1.1 Niketa mcondvofana waleligama "**umphakatsi**". (1)
- 5.1.2 Niketa ligama lelihlonipha leli lelidvvetjelwe kulomusho lolandzelako:  
Emuva kwekufa kwemsunguli walelicembu yahlakateka Imithente. (1)
- 5.1.3 Tsatsa sabito selinani lesitfolakala kulethekesthi utakhele wakho umusho lowehlukile kulona lokulethekesthi. (2)
- 5.1.4 Bhala mcondvophika waleligama lelicindzetelwe kulomusho longentasi.  
Imithente yatiwa **kakhulu** ngetingoma letifaka ekhatsi leti letilandzelako. (2)

- 5.1.5 Ngabe leligama "**SAMA**" liyi-akronimi kumbe lisifinyeto? Usho ngani? (2)
- 5.1.6 Khipha libitomfakela lelitfolakala kuletheksthi wakhe ngalo umusho lowehlukile kulona lokuletheksthi. (2)
- 5.1.7 Cala lomusho lolandzelako ngekutsi "lomnyaka lotako".  
Bobabili besebayingwe nengwenyama. (2)
- 5.1.8 Bhala sinciphiso saleligama "umsindvo" bese wakha ngalo umusho lowehlukile kulona lokuletheksthi. (2)
- 5.1.9 Cala lomusho lolandzelako ngekutsi "**Cha**".  
Bona batsi bayacabanga kutsi intfo lenjalo ingenteka. (2)
- 5.1.10 Khipha sabito lesibandlululako kuletheksthi utakhele wakho umusho lowehlukile kulona lokuletheksthi. (2)
- 5.1.11 Tsatsa ligama lelicindzetelwe kulomusho lolandzelako bese ulikhulisa ngesijobelelo lesifanele bese ubuye utakhele umusho lowehlukile kulona lokuletheksthi.  
Emuva kwekufa **kwemsunguli** walelicembu yahlakateka Imithente. (2)
- 5.2 5.2.1 Bhala bomahambisana labatfolakala kuletheksthi bese uyabachaza kutsi basho kutsini? (2)
- 5.2.2 Caphuna umusho lonenkhulumo lehungako bese uwubhala phasi. (2)
- 5.2.3 Shano tindlela tesento letikulemisho lelandzelako:  
(a) Buselaphi wabese ucala kuticulela yedvwa. (1)  
(b) Lelicembu liwuhambile umhlaba futsi latfola nemiklomelo. (1)
- 5.3 Lungisa emaphutsa elulwimi latfolakala kulomusho lolandzelako:  
hamba ke yesipho (4)

[30]

**30 emamaki**

**Samba: 100 emamaki**